

SUURAT At-TAGHAABUN:

Magaca Eebe yaan ku bilaabaynaa ee Naxariis guud iyo mid gaaraba Naxariista.

- 1. Waxaa Eebe nasaha (weyneeya) waxa Samaawaatka (Cirka) iyo Dhulka ku sugan awood iyo mahadbana Eebaa iska leh, wax walbana isagaa kara.*
- 2. Eebe waa kan idin abuuray qaarkiinna gaaluu noqday, qaarkiinna Mu'miniin, Eebana waxaad Camal falaysan waa arkaa.*
- 3. Samaawaatka (Cirka) iyo Dhulkaba wuxuu Eebe u abuuray si xaq ah, wuuna idin sawiray Eebe, dadoow suuraddiinana wuu wanaajiyey, isagaana loo noqon.*
- 4. Wuxuu ogyahay waxa samaawaatka (Cirka) iyo Dhulka ku sugan, wuxuuna ogyahay waxaad qarinnaysaan iyo waxaad muujinaysaan, Eebana waa ogyahay waxa laabta (Qalbiga) ku jira.*

Sharaxda Suurrada (1)

Eebe waxaa u khushuuca una hogaansama awooddiisa waxaa ku sugan cirka iyo dhulka sida Aayado badan sheegeen, isagaana mahad iyo qudradba iska leh, bani Adamkana isagaa abuuray jidkana tusiyey samaan iyo xumaanba, abuurka Eebana ciyaar ma aha ee waa xigmo iyo imtixaan, waxaa dadku camal falana waa ogyahay dhamaantiis, saas daraadeed waa in niyada iyo qalbigaba la daahiriyo Eebana la weyneeyo illeen isagaa awood leh loona noqone.

- 5. Miyuuna idin soo gaarin warkii kuwii gaaloobay ee horreeyey, waxay dhadhamiyeen xumaantii camalkoodii, waxaana u sugaaday caddibaad daran.*
- 6. Arrintaas waxaa ugu wacan in Rasuullo ulla yimaadeen xujooyin ayna dheheen (Gaaladii) ma dadbaa na hanuunin ayna gaaloobeen oo jeedsadeen, iskana deeqtoonaysiiyeen (weynaysiiyeen) Eebe, Eebana waa midka hodanka ah lana mahadiyo.*
- 7. Waxay sheegeen kuwii gaaloobay inaan la soo bixinaynin, waxaad*

dhahdaa taas ma aha, Eebaa wuxuu ku dhaartay in la idin soo bixin laydinkana warrami waxaad camal fasheen, taasina waa u fududahay Eebe.

8. Ee rumeeya Eebe iyo Rasuulkiisa iyo nuurka Eebe soo dejiyey (Quraanka) Eebana waxaad camal falaysaan waa ogyahay.

9. Maalinta qiyaamada ee Ilaahay idin soo kulmin waa maalin kado, ruuxiise Ilaah rumeeya camal wanaagsanna fala Eebe xumaantiisa (dambigiisa) wuu asturi, wuxuuna galin Jannooyin ay dhex dureeraan Wabiyaal way kuna waaraan waligood, taasina waa liibaan weyn.

10. Kuwa gaaloobayse beeniyeyna Aayaadka Eebe waa kuwa Ahlu Naar ah waxayna ku waari dhexdeeda, meel loo ahaadana iyadaa u xun.

Sharaxda Suurrada (2)

Warkii ummadii hore waxaa looga dan leeyahay in lagu waano qaato lagana leexdo jidkoodii xumaa ee xaq diidka iyo madax adaygga ahaa, lana rumeeyo quraanka Nuurka Eebe ah iyo xaqoo dhan si Eebe maalinta Qiyaame ee kulminta naxariis iyo Jannooyin inoo siiyo loona gaadho liibaan Eebe, lagana nabad galo naar daran oo loo darbay xaq diidayaasha. Muqaatilna wuxuu yidhi: ‘Ma jiro khasaare ka weyn in kuwaasina Janada galaan kuwaasina lala aad Naarta.’

11. Wixii Musiiba ah (dhib ah) oo dhaca waa idinka Eebe, ruuxiise Eebe rumeeya waxaa hanuuni (oo xasili) qalbigiisa, Eebana wax walba waa ogyahay.

12. Eebe adeeca Rasuulkiisana adeeca, haddaadse jeedsataan (xaqa diidaan) waxaa Rasuulka saaran uun inuu si cad wax u gaarsiiyo.

13. Eebe mooyee Ilaah kale ma jiro, isaga uunna ha tala saarteen Mu’miniintu.

14. Kuwa xaqa rumeeyow Haweenkiina iyo Caruurtiina waxaa ka mid ah kuwo Col idiin ah ee ka digtoonada, haddaadse iska cafidaan saamaxdaanna Eebe waa dambi dhaafe naxariiste ah.

15. Xoolihiinnu iyo Carrurtiinnu waa uun fidno (ibtilo) Eebe agtiisaase ajir weyn (ku sugan yahay).

Sharaxda Suurrada (3)

Wax walba idinka Ilaah yuu ku dhacaa, ruuxiise Eebe rumeeya waxaa hanuuni oo toosi xasilina qalbigiisa, saas daraadeed waa in Eebe iyo Rasuulkiisa (Naxariis iyo Nabadgalyo korkiisa Eebe ha yeelee) la adeeco waan in Eebe lagu xidhnaado lana tala saarto wax kastoo xaqaa kaa leexin ama kaa shuqlinna laga digtoonaado, maxaa yeelay Eebaa wax loo dhawaada ah. Rasuulkuna wuxuu yidhi (Naxariis iyo Nabadgalyo korkiisa Eebe ha yeelee): “Ilmuhu waa midhaha qalbiga, wayna ku fulayeeyaan, kuna bakhaylsiyaan, kuna walbahaariyaan.”

16. Eebe ka dhawrsada intaad kartaan, maqla oo adeecana (weyneeya), waxna baxsada, ruuxii laga dhawro bakhaylnimada naftiisa waa liibaanay.

17. haddaad Eebe amaah fiican amaahsataan (wax sadaqaysataan) Eebe waa idiin laab laabi, dambigiinana wuu dhaafi, Eebana waa kan la mahadiyo ee dusha san.

18. waxa maqan iyo waxa joogaba Eebe waa ogyahay waana adkaade Falsan

Sharaxda Suurrada (4)

Diinta Islaamku ma aha wax lagu dhaqmi waayi oo adag, ee waa fududahay, Eebana dadka wuxuu ka rabaa intay karaan uun inay ka yaabaan, waan in xaqaa laysku maqlaa layskuna adeecaa, waxna la baxsadaa bakhaylnimada iyo xoola hacaylka daranna laga fogaadaa, si Eebaha wax walba og inoogu abaal mariyo wanaag iyo khayr. Waxaa sugnaaday: Haddaan wax idin faro la imaada waxaad kartaan, haddaan idinka reebana ka reebtoonaada. waa Saxiix.